

EDITORIAL

Biguin ang imbing pakana ni Duterte na palawigin ang kanyang diktadurang paghahari

Gaya ng kanyang iniidolng diktador na si Marcos, hinahangad ni Duterte na magtagal sa estado-poder at maghari lagpas sa kanyang termino. Tigas-mukha siyang nagluluto ng mga pakana upang makapanatili sa kapangyarihan at takasan ang kanyang mga krimen sa bayan. Higit lamang nitong itinutulak ang mamamayang Pilipino na ubos-kayang kumilos para hadlangan ang pananatili sa kapangyarihan at ibagsak ang pasistang diktadura ni Duterte.

Matapos mabigo ang kanyang pakanang *charter change* at pederalismo, nakatutok na ngayon si Duterte para ipanalo ang eleksiyong 2022. Inuulit lamang ni Duterte ang kanyang drama noong eleksiyong 2016 sa mga urong-sulong at sinungaling na mga pahayag ngayon na tutol siya sa pagtakbo ng kanyang anak na si Sara bilang presidente at wala na syang interes maghangad ng pambansang pusisyon. Kalokohan ang sinabi ng Malacañang na hindi *political dynasty* ang itinatayo ng

mga Duterte. Hindi rin maitatangi ang papel ni Duterte sa pagmanipula at pagkontrol sa mga nagaganap sa loob ng partidong PDP-Laban sa pagtutulak ng paksyong Cusi na tumakbong bise presidente si Duterte. Malinaw ding si Duterte ang utak sa inilalakong tambalang Duterte-Duterte o kung sinuman ang kanyang babasbasang erederro para sa eleksiyong 2020. Tuluy-tuloy ang mga lihim na pulong at kasunduan ng pamilyang Duterte sa iba pang mga pulitiko at partido para sa kanilang

pampulitikang ambisyon. Matapos ito, samu't saring partido at pulitiko ang nagpahayag ng kanilang suporta kay Sara sa pagtakbo sa pagka-presidente.

Pinapakana ni Duterte na manipulahin ang eleksiyong 2022 para manatili sa kapangyarihan. Nabili ng kroni ni Duterte na si Dennis Uy ang kumpanyang TIM na kasabwat ng Smartmatic, na kinontrata ng Commission on Elections (COMELEC) para sa awtomasyon ng eleksiyon at pagbibilang ng mga boto. Ilang



NILALAMAN

- 1 *Editorial: Biguin ang imbing pakana ni Duterte na palawigin ang kanyang diktadurang paghahari*
- 3 *Balitang TO at Kilos Protesta*
- 4 *Mga dambuhalang dam ni Duterte sa Quezon at Rizal, dambuhalang suliranin at pasanin ng mamamayan*
- 6 *Tuluy-tuloy na tutulan ang pagtatayo ng Macalelon dam*
- 7 *Paano itinataguyod ng rebolusyonaryong kilusan ang karapatan ng mga may piniling kasarian*
- 9 *Tugon ni Patnubay de Guia: Ano ang tindig ng rebolusyonaryong kilusan sa pananakop ng China sa isla ng Spratly*
- 11 *Bantay Karapatan*
- 12 *Wala akong ibang sadya at Tunay na Ginto*

Ang KALATAS ang opisyal na pahayagan ng rebolusyonaryong mamamayan ng Timog Katagalugan. Pinapatnubayan ito ng Marxismo-Leninismo-Maoismo. Inilalathala ito ng Partido Komunista ng Pilipinas (MLM) at ng Bagong Hukbong Bayan ng Timog Katagalugan.

Inaanyayahan ng patnugutan ang mga mambabasa na mag-ambag sa pagpapahusay ng ating pahayagan. Magpadala ng mga komentaryo at mungkahi, balita at rebolusyonaryong karanasan na maaaring ilathala sa ating pahayagan. Ito ay tumatanggap ng mga liham sa:



st.kalatas@gmail.com



balikwastk.wordpress.com

buwan bago ang eleksiyong 2022, titiyakin ni Duterte na mailuluklok ang bagong *chairman* at mga komisyoner na magtataguyod ng kanyang interes sa darating na eleksiyong 2022.

Mas pinahihigpit ni Duterte ang kontrol sa AFP-PNP bilang kanyang pribado at mersenaryong hukbo upang gamitin sa pandaraya sa eleksiyong 2020 at laban sa kanyang mga katunggali sa pulitika hanggang sa pagpapataw na mismo ng Martial Law sa buong bayan.

Nagpapakana rin ang rehimen ng mga *false flag operations* kung saan ibibintang sa BHB ang mga pamamaslang kasabay ang paglulunsad ng maramihang pag-aresto at pagpatay sa mga aktibista at progresibo upang supilin ang hayag na kilusang masa at likhain ang kundisyon para maipataw muli ang Martial Law. Nauna na itong nagdeklara ng todogera laban sa karaniwang mamamayan sa pamamagitan ng pag-aarmas sa mga *vigilante* bilang bahagi ng kontra-rebolusyonaryong kampanya ng estado.

Sa pambansang antas, lumalala ang girian sa pagitan ng mga paksyon ng naghaharing uri na iniresulta ng pakikipagmabutihan ni Duterte sa dalawang among imperyalistang US at China.

Sa likod ng lumalalang krisis pampulitika sa bansa at ang kinakaharap na pagpapalawig ng diktadura ni Duterte, tiyak na makikialam ang imperyalistang US at China sa darating na halalan para sa kanilang sariling interes. Nais nilang masiguro na ang mailuluklok na pinuno ay magsisilbing tuta upang umayon sa mga geo-pulitikal na plano nila sa rehiyong Asya-Pasipiko. Nauna nang sinabi ng China na gusto nitong manatiling presidente si Duterte. Samantala, nakakubabaw pa rin ang imperyalismong US sa Pilipinas at ito pa rin ang imperyalistang may pangunahing kontrol sa ekonomiya, pulitika at militar ng bansa. Nagsasagawa ang pangkating Duterte ng mga maniobra para magpataas ng presyo sa imperyalismong US katulad ng pagpapalawig ng Visiting Forces Agreement upang makahuthot pa ng dagdag pondo, kagamitan at ayudang militar.

Ang pagkakapit-tuko ni Duterte sa Malacañang ay palatandaan ng kanyang desperasyon at takot sa nakaambang pang-uusig sa kanyang mga krimen oras na bumaba siya sa pagkapresidente. Sa ilalim ng kanyang panunungkulan, nilikha niya ang kultura ng impyunidad na nagdulot ng napakaraming mga paglabag sa karapatang tao at kabilang pamamaslang sa gera kontra iligal na droga at anti-komunistang kampanya. Hindi nalutas ang problema sa droga bagkus siya pa ang naging pangunahing *druglord* at pinuno ng sindikato sa droga sa bansa.

Nagpakatuta siya sa China at US para makakuha ng mga pondo, pautang, suporta at bakuna. Ibinenta niya ang pambansang soberanya at isinuko ang West Philippine Sea sa China. Tinalikuran niya ang usapang pangkapayapaan, isinabatas ang Anti-Terror Law at ipinatupad ang JCP-Kapanatagan ayon sa kumpas ng US.

Dinambong ni Duterte ang yaman ng bansa at pinagpasasaan ito ng kanyang mga kaanak, alipores at kroni. Binusog niya sa korapsyon ang AFP-PNP para gawing pribadong hukbo. Pinabayaan niya ang mamamayang Pilipino na magdusa sa gitna ng pandemyang COVID-19. Lalong naghirap ang sambayanan sa malawakang disempleyo at mataas na presyo ng mga bilihin. Nasadlak sa walang kaparis na kahirapan ang Pilipinas at umabot sa P10.9 trilyon ang utang ng bansa.

Malawak na ang disgusto ng bayan sa rehimeng Duterte dahil sa lantad at umaalingasaw na baho nito. Pinasidhi pa ito ng kanyang pagkagahaman sa kapangyarihan sa pakanang maghari lagpas 2022. Ang pagsalubong ng malawakang pagbatikos at pagtutol dito ng mamamayan ay pagpapakita ng labis na pagkasuklam at galit ng sambayanan sa teroristang rehimeng Duterte. Higit na umaalab ang pakikibakang bayan para wakasan ang kahirapan at pandarahas sa ilalim ng diktadurang paghahari.

Malaki ang hamon at tungkulin ng mamamayan para biguin ang imbing pakanang manatili sa kapangyarihan ni Duterte. Kailangang higit na palakasin ang hanay sa pagbubuo ng isang malapad na nagkakaisang

prente upang labanan ang iskemang palawigin ang kanyang termino. Dapat na buuin ang malawak na alyansang anti-Duterte upang higit na mahiwalay ang rehimen sa malawak na sambayanang Pilipino at internasyunal na komunidad. Magpursigeng singilin si Duterte para panagutin sa kanyang mga krimen sa bayan.

Isulong ang panunumbalik ng usapang pangkapayapaan sa mga naliliwanagang pwersa ng naghaharing sistema upang

mabigyang-daan ang pagkakamit ng tunay, matagalan at makatarungang kapayapaan sa pamamagitan ng paglutas sa mga ugat ng armadong tunggalian at pagkamit ng mga tunay na repormang sosyo-ekonomiko at pulitikal.

Kasabay nito, palakas in ang Bagong Hukbong Bayan at mga rebolusyonaryong base sa kanayunan. Paigtingin ang digmang bayan at biguin ang kontra-rebolusyonaryong gera ng teroristang rehimen Duterte. Maglunsad ng mga taktikal na

opansiba at gawaran ng punitibong aksyon ang mga despotikong kaaway sa uri at mga sagad-saring kontra-rebolusyonaryo't pasista sa loob ng rehimen Duterte.

Hinog ang kasalukuyang sitwasyon upang sumulong ang pambansa demokratikong rebolusyon tungong tagumpay. Taliwas sa daang tinatahak ng rebolusyonaryong kilusan, walang ibang patutunguhang landas ang rehimen Duterte at mga naghaharing-uri kundi ang pagbagsak. ☒

BALITANG TO



1 patay at 2 sugatang AFP sa ambus ng AMC-BHB Quezon

Kumpirmadong patay ang isang sundalo habang dalawa ang sugatan matapos masabugan ng *command detonated explosive* ng Apolonio Mendoza Command (AMC)-BHB Quezon ang 6x6 *military truck* na lulan ang mga mag-ooperasyong 85th Infantry Battalion of the Philippine Army (IBPA) at pulisya sa Brgy. Batabat Sur, Buenavista, 11:40 ng umaga noong Hunyo 5.

Sa kanilang kahihiyan, pinalabas ng mga buhong na pasista na inatake sila ng AMC sa proseso ng paglulunsad ng *relief operations* sa naturang baryo. Ngunit ang totoo, plano nilang iparada ang mga sapilitang pinasukong taumbaryo, kabilang ang mga katutubong

Manide (isang grupo ng mga Aeta). Nilalansi ng mga berdugo ang mga katutubo gamit ang pekeng *relief operations* para maging makinarya ng NTF-ELCAC. Sinusuhulan ang mga mamamayan ng bigas at *groceries* at may mga binigyan ng *cellphone* para obligahing magreport sa mga sundalo.

Noong huling linggo ng Mayo, nagreklamo ang taumbaryo at mga katutubo sa kakarampot na ipinamahaging *relief goods* sa Barangay del Rosario, San Pedro at Mabini ng Buenavista gayong daan-daang sako ng bigas ang nalikom na donasyon. Iginigiit nilang maglabas ng tapat na ulat ang lokal na ahensya ng guberno at 85th IBPA sa kanilang nalikom at distribusyon. Ipinagbunyi

ng mamamayan ng Quezon ang matagumpay na taktikal na opansiba ng BHB Quezon. Ayon naman kay Cleo del Mundo, tagapagsalita ng AMC-BHB Quezon, "Ang aksyong militar ng AMC ay pamamarusa sa 85th IBPA sa patung-patong nitong kasalanan sa mamamayan kabilang ang pambobomba at walang habas na pamumutok sa mga komunidad ng hangganan ng Buenavista, Catanauan, Mulanay at San Narciso noong Pebrero 5-8; walang-awat na *focused military operations* at *retooled community support program operations*; at pagsisilbing *private army* at *security* ng mga negosyo ng panginoong maylupa-burukrata na si Mayor Ma. Remedios Uri-Rivera ng Buenavista." ☒

KILOS PROTESTA



Mamamayan ng TK, nagprotesta sa araw ng huwad na kalayaan

Naglunsad ng kilos-protesta ang iba't ibang grupo at organisasyon sa pangunguna ng Bagong Alyansang Makabayan-Southern Tagalog (BAYAN-ST) sa ika-123 taon ng huwad na kalayaan sa bansa noong Hunyo 12. Bitbit nila ang istrimer na may panawagang: "Mamamayan ng Timog Katagalugan, sama-samang isulong ang pambansang soberanya at demokrasya sa ika-123 taon ng huwad na kalayaan! Patalsikin ang makadayuhan, pasista at pahirap na rehimen Duterte!"

Tumungo sa Kawit, Cavite ang aabot sa 200 delegado bandang alas-9 ng umaga. Sinimulan nila ang programa sa paglulunsad ng *flag dance*, kasunod ang pagkondena

sa ilusyong kalayaan na taun-taong ipinagdiriwang ng reaksyunaryong guberno.

Ayon sa BAYAN-ST, "Ibinilanggo ng mga dayuhan ang mamamayang Pilipino sa mga neoliberal na polisiya at ngayon, ang mga palpak na pagtugon sa COVID-19 na nakaasa sa dayuhang ayuda at programa gaya ng mga bakuna at pondo. Patuloy na naghihirap ang mga magsasaka sa mga huwad na reporma sa lupa at pagpapalit-gamit ng lupa habang nananatiling kontraktwal ang mga manggagawa upang bigyang-daan ang dayuhang interes."

Kinundena rin ng mga nagprotesta ang kainutilan ng

rehimen Duterte sa pagtatanggol sa West Philippine Sea (WPS) at ang paninikluhod nito sa China.

Matapos ang programa sa Kawit, naglunsad ng *protest caravan* ang mga raliyista at nagsagawa ng mga mobilisasyon sa Brgy. Talaba 7, Bacoor, pagawaan ng Yazaki sa Imus at Kadiwa, Dasmariñas. Lumundo ang *caravan* sa isang kilos-protesta sa Pala-pala, Dasmariñas bandang alas-dos ng hapon.

Pagtatapos ng BAYAN-ST, "Patuloy na ipaglalaman ng mamamayang Pilipino ang tunay na kalayaan ng Pilipinas, kabilang ang pagtatanggol sa soberanong karapatan nito sa WPS." ☒

Mga dambuhalang Dam ni Duterte sa Quezon at Rizal, dambuhalang suliranin at pasanin ng mamamayan

May pandemya o wala, tuloy ang pagragsada ni Duterte sa mga proyektong New Centennial Water Source -Kaliwa Dam sa Quezon at Wawa-Violago Dam sa Rizal. Sa ngalan ng pagpapakatuta ni Duterte sa imperyalismong China, minamadali na ngayon ng rehimen ang pagtatayo ng Kaliwa Dam bago matapos ang kanyang termino sa 2022. Sa tuluyang pagtiklop ng rehimeng Duterte sa imperyalismong China sa harap ng mga pinag-aagawang teritoryo sa West Philippine Sea, hindi na dapat pagtakhan kung bakit ganun na lamang ang pagmamadali ng rehimen na tapusin ang ipinagmamalaki nitong Kaliwa Dam at iba pang proyekto sa ilalim ng programang Build, Build, Build. Niraratsada ni Duterte na tapusin ang Kaliwa Dam upang habulin ang mga ipinangako nito sa imperyalistang China kapalit ng pambansang patrimonya at soberanya.

Samantala, bilang utang-na-loob niya sa burgesya-kumprador at kroni na si Enrique Razon, minamadali na rin ng rehimen ang pagkukumpleto ng Wawa-Violago Dam na tiyak na magiging sanhi ng paglubog at grabeng pagbaha sa ilang bahagi ng Rizal at kadikit na syudad ng Marikina.

Pagragsada ni Duterte sa Kaliwa Dam, para sa China at hindi para sa mamamayan

Upang iratsada ang pagtatayo ng Kaliwa Dam, isang *joint venture* ng Metropolitan Waterworks and Sewerage System (MWSS) at China Energy Engineering Corporation (CEEC), gagamitin ang isang *tunnel boring machine* (TBM) o isang makinang pambutas ng kabundukang dadaanan ng *tunnel* na pinangalanang 'Sampaguita' para hukayin ang 21.7 kilometrong-haba ng *tunnel*. Ang TBM ay nagmula sa kumpanyang China Railway Construction Heavy Industry, Co., Ltd (CRCHI), at inaasahang darating sa Port of Manila sa Hulyo 2021 na dadalhin sa *outlet portal* sa Teresa, Rizal. Kung kagyat na maipupwesto, kaya nang umpisahan ang paghuhukay para sa Kaliwa Dam sa darating na Disyembre taong kasalukuyan.

Pabibilisin nga ng TBM ang paghuhukay ngunit higit pa nitong palalakiin ang panganib ng *underground* at *complex tunneling* sa mamamayang naninirahan sa lugar at pabibilisin din ang pagkawasak ng kabundukan.

Sa ilalim ng Belt and Road Initiative ng China at Build, Build, Build ni Duterte, ipinagkaloob ng CRCHI ang TBM upang higit na pabilisin ang paggawa

ng proyektong Kaliwa Dam. Pinangangambahan ng mga residente ang pagguho ng lupa sa mga daraanan ng nasabing *tunnel* sa gagawing paghuhukay ng MWSS mula sa kabundukan ng Sierra Madre ng Quezon hanggang sa lalawigan ng Rizal na may lalim na 200 hanggang 500 metro.

Kahit hindi pa nakukuha ang Free Prior and Informed Consent (FPIC) mula sa mga grupong Dumagat na siyang pangunahing maapektuhan ng nasabing proyekto, nagpapatuloy ang operasyon ng MWSS para sa pagtatayo ng Kaliwa Dam. Katuwang ang National Commission on Indigenous People, matinding pananakot, pambabraso at pagmamaniobra naman ang ginagawa ng MWSS sa mga komunidad ng mga grupong Dumagat at di katutubo, mapapayag lamang sila sa isang kasunduan para bigyang-daan ang dambuhalang proyekto.

Wawa-Violago, banta sa mga Rizaleño

Tulad ng panganib na idudulot ng Kaliwa Dam, pinangangambahan naman ng mga Rizaleño ang magiging epekto sa kanilang buhay

at kabuhayan ng proyektong 500 MW Wawa Pumped-Storage Hydropower Project o mas kilalang Wawa-Violago Dam ng kumpanyang WaWa JVCO Inc., isang *joint venture company* ng Prime Metroline Infrastructure Holdings Corp. (Prime Infra) na pagmamay-ari ni Enrique Razon at San Lorenzo Ruiz Builders and Developers Corp. na pamamay-ari naman ni Oscar Violago. Ang nasabing proyekto ay inaprubahan ng rehimeng Duterte sa ilalim ng isang 30-year raw water supply *offtake agreement*.

Itatayo ang *power plant* ng nasabing proyekto sa Wawa River Basin at Montalban River Sub-basin na nagmumula ang tubig sa Montalban River patungong Wawa River, at tubig na galing sa Mt. Purro. Isang kilometro-habang *tunnel* ang huhukayin na daraanan ng tubig mula sa Montalban at Wawa River na siyang pagkukunan ng kuryente.

Apektado ng nasabing proyekto ang mga residente ng Rizal laluna ang mga nasa Brgy. Calawis at San Jose ng Antipolo City, Brgy. Pintong Bukawe, San Mateo at Brgy. Puray at San Rafael sa Rodriguez kabilang din ang ilang barangay sa Marikina



OLYMPIA
VIOLAGO POWER



PRIME INFRA

City. Noong pagtatapos ng taong 2020, matatandaang ang mga lugar na ito rin ang naapektuhan ng matinding pagbaha na dulot ng mga sunud-sunod na bagyong nagdaan sa bansa na nagdulot ng pagragasa ng baha mula sa mga kabundukan at operasyon ng mga quarry.

Militarisasyon at red-tagging

Habang hinahapit na ng rehimen ang kagyat na pagsisimula at pagtatapos ng paggawa ng Kaliwa Dam at Wawa-Violago Dam, iniratsada din nito ang kanyang kampanyang *red-tagging* at pagpatay sa mga indibidwal na mariing tumututol sa nasabing proyekto. Maraming mamamayan ng Quezon at Rizal ang hindi pumayag sa inilabas na *memorandum of agreement* ng rehimen na nagpapahintulot sa paggawa ng Kaliwa Dam habang maraming Rizaleño naman ang patuloy na tumututol sa Wawa-Violago Dam.

Tanging pandarahas ang tugon ng rehimen Duterte sa hinaing ng mamamayang mariing tumututol sa mga proyektong mapaminsala sa kalikasan at kanilang kabuhayan. Matatandaang

pinaslang ng mga mersenaryong AFP-PNP ng 80th IBPA at PNP-Rizal ang mga Dumagat na sina Puroy at Randy 'Pulong' dela Cruz sa Sitio Mina, Brgy. Sta. Ines, Rodriguez, Rizal noong Marso 7 na kabilang sa krimeng 'Bloody Sunday' ng rehimen.


Samantalang noong Abril, maramihang inaresto naman ng 80th IBPA at PNP-Rizal ang 30 Dumagat at Remontado sa Brgy. Puray, Rodriguez. Noong Mayo 6 naman, pinakahuling inaresto ang mga Dumagat na sina Garry "Kuruntoy" Doroteo sa kanyang bahay sa Brgy. Sta. Ines, Tanay, Rizal at si Kagawad Loreto Miranda Bolino ng Brgy. Lumutan, Gen. Nakar, Quezon sa pamamagitan ng mga singkronisadong operasyong pulis at militar. Sinampahan sila ng mga gawa-gawang kasong kriminal at pinalalabas silang may kinalaman sa rebolusyonaryong kilusan.

Bago ang mga nasabing ilegal na pag-aresto at pagpatay, hindi na tinantanan ng mga *focused military operation* at RCSPO ang mga barangay ng Pagsangahan at Lumutan ng General Nakar, Quezon at Brgy. Calawis sa

Antipolo City, Brgy. Puray sa bayan ng Rodriguez at Brgy. Sta. Ines sa Tanay, Rizal. Target ng mga inilulunsad na operasyong militar ang mga grupong Dumagat at mamamayan na aktibong kumikilos upang tutulan ang mga dambuhalang proyektong ito.

Pagtutol at paglaban sa mga dambuhalang Dam

Mahigpit na tinututulan ng mamamayan ang Kaliwa Dam Project at Wawa-Violago Dam dahil sa banta ng pagkawasak ng kanilang kabuhayan at tirahan at mapanirang epekto sa kalikasan. Patuloy silang lumalaban para ipahinto ang mga mapaminsalang proyektong ito.

Nananatiling makatwiran ang pagbuklod-buklod at paglaban ng mamamayan upang tutulan ang mga proyektong tanging delubyo ang idudulot sa kanila at kaunlaran para sa iilan lamang. Batid nilang sa huli'y raragasa ang kanilang mga pagkilos at protesta laban sa mga dambuhalang proyektong ito na tulad ng nabubulok na rehimen Duterte ay tatangayin din ng lakas ng agos ng kanilang pakikibaka. 

LATHALAIN

Tuluy-tuloy na tutulan ang pagtatayo ng Macalelon Dam

Patuloy na umaagos sa puso ng mamamayan ng Macalelon ang masidhing pagtutol sa dalawang proyektong dam ng reaksyunaryong guberno sa Brgy. Vista Hermosa at San Isidro — ang *multi-purpose dam* at ang kukumpunihing *irrigation dam* ng National Irrigation Administration (NIA). Makalipas ang isang dekada, hindi pa rin naglulubay ang kagustuhan ng mga taga-Macalelon na ipagtanggol ang kanilang sariling lupa, mga puno ng niyog, saging at iba pang mga pananim na pinangangambahang maaapektuhan ng itatayong mga dam.

Bakit tinututulan ng mamamayan ang Macalelon Dam

Winasak ng pagguho ng *irrigation dam* sa Brgy. Vista Hermosa ang kabuhayan at pamumuhay ng mamamayan noong 2010. Daan-daang puno ng niyog at saging ang tinangay ng baha at dalawang bahay ang nasira dulot nito. Ang malupit pa, ni hindi nagbayad ng danyos-perwisyo ang NIA, kontraktor, at/o lokal na reaksyunaryong guberno.

Kalakaran na ng NIA na hindi magbayad sa mga perwisyon ginagawa nito sa mamamayan. Sa panahong itinatayo pa lang ang dam at mga kanal nito noong 2009, hindi sila nagbayad ng *disturbance compensation* sa mga pinutol na libu-libong puno ng niyog at saging. Gayundin, hindi binayaran ng NIA ang *right of way*. Paulit-ulit na nangako ang NIA na may kabayaran ang mga napinsalang kabuhayan, at pabalik-balik din naman ang mga apektadong magsasaka sa paniningil sa NIA.

May utang na sa mamamayan ang ahensya, pero balak pa nitong muling kumpunihin ang nasirang *irrigation dam* at magtayo ng isa pang *multi-purpose dam*.

Kawalan ng sariling lupa at pananim

Hindi para sa tunay na kaunlaran at kaalwanan ng buhay ng mga magsasaka at iba pang mamamayan ang proyektong dam, kundi para sa interes at pagpapayaman ng mga kapitalista, pulitiko at kontraktor. Kailanman ay hindi isinaalang-alang

ng mga nagtataguyod ng pagtatayo ng dam ang magiging epekto nito sa mga residente ng Macalelon.

Kapag natuloy ang *multi-purpose dam* ng NIA sa Vista Hermosa, palulubugin nito sa kagyat ang mahigit sa 1,000 ektarya ng produktibong lupaing kasalukuyang nililina ng mga magsasaka sa ilayang bahagi ng Vista Hermosa at Sta. Elena sa bayan ng Lopez. Aabot hanggang 250,000 puno ng niyog ang maaaring masira kung puro niyog ang tanim sa bawat ektarya.

Bukod dito, tinatayang maaaring palubugin ang anim na baryo ng Macalelon tulad ng Vista Hermosa, San Isidro, Mambog, Olongtao, Taguin, at mismong kabayanan ng Macalelon sa panahong magpaawas ng tubig ang dam dahil sa malakas na pag-ulan o may bagyo. Maaaring umabot ang pagbaha hanggang sa mga baryo ng Pitogo at General Luna depende sa dami ng tubig na paaawasin.

Ilegal at kawalan ng pahintulot sa mamamayan

Walang ipinapakitang Environmental Compliance Certificate (ECC) at Environmental Impact Assessment Study (EIAS) ang NIA at lokal na guberno na nagtataguyod ng proyektong ito. Ang ECC at EIAS ay mga dokumentong hinihingi ng DENR para sa mga proyekto at programang nakapipinsala sa kalikasan (*environmentally hazardous projects and programs*). Patunay ang ECC at EIAS na may plano ang mga nagpapatupad ng proyekto na paliitin ang pinsala hanggang sa pawiin ang masamang epekto nito sa mamamayan.

Wala ring *social acceptability certificate* na magpapatunay na katanggap-tanggap sa mamamayan ang mga proyekto. Samakatuwid, tumitindig ang mga residente ng Macalelon na hindi katanggap-tanggap para sa kanila ang pagtatayo ng *multi-purpose dam* at pagkukumpuni sa gumuhong *irrigation dam*.

Pakikibaka ang tugon ng mamamayan

Kagyat na nagpamalas ng masidhing pagtutol ang mga residente ng Macalelon dahil sa masamang epekto ng mga dam sa kanilang kabuhayan at kaligtasan. Humugos ang mga kilos-protesta at nagpepetisyon ang mamamayan upang mahinto ang pagtatayo ng dam. Dahil sa pagkakaisa ng mamamayan na tutulan ang proyektong ito, halos isang dekadang natigil ang pagtatayo ng mga mapaminsalang dam.

Gamit ang kanilang kapangyarihan at salapi, sinagasaan ng NIA at lokal na guberno ang mga ligal na prosesong dapat daanan ng mga ganitong tipo ng proyekto. Walang sapat na demokratikong konsultasyon sa mamamayan, laluna sa mga maapektuhang pamayanan.

Sinamantala nila ang kahirapang dinaranas ng mga magsasaka para bilhin ang kanilang lupa at mga pananim sa panahong bumulusok ang presyo ng kopra mula noong 2019 kasabay ng matinding tagtuyot sa buong Quezon. Nililina nila ang mamamayan sa pagwawasiwas ng “mga benepisyo” na makukuha rito at sinusuhulan sila gamit ang mga panandaliang trabaho na makukuha sa konstruksyon ng dam.

Ginagamit ng lokal na naghaharing-uri ang mga pwersang militar at CAFGU upang magsilbing gwardya sa konstruksyon nito. Noong Pebrero 2010, itinayo ang detatament ng 85th IBPA sa Sityo Paradahan ng Brgy. Vista Hermosa para bantayan ang itatayong Dam. Makalipas ang limang taon, inalis ang detatament dahil ito ay dadaanan ng *irrigation*. Mula 2015, sinasaklaw ang Vista Hermosa ng mga operasyong militar ng mga sundalo mula sa kampo nito sa Brgy. San Vicente, Macalelon para bantayan ang itinatayong dam. Ipinakat naman ang 59th IBPA at itinayo ang detatament nito sa Sityo Sentro ng Vista Hermosa noong huling kwarto ng 2019 hanggang Marso 2020. Napalayas ang naturang kampo matapos magpetisyon ang



taumbaryo na sinuportahan ng Sangguniang Barangay. Kahit wala na ang kampo, isa pa rin ang Vista Hermosa sa pinakamilitarisadong komunidad sa Macalelon. Halos araw-araw naglulunsad ng operasyong militar sa barangay sa anyo ng rekurida, at kamakailan ay laging umiikot ang trak ng sundalo na nagkakalat ng polyeto at pahayag ng mga itim na propaganda laban sa rebolusyunaryong kilusan.

Sa panunumbalik ng proyekto sa ilalim ng rehimeng Duterte, higit na kailangang tumindig ang mamamayan upang ipagtanggol ang kanilang lupa at kabuhayang deka-dekada na nilang naipundar. Hangga't hindi pa natatapos ang pagtatayo ng mga dam ay hindi dapat mawalan ng pag-asa ang mga taga-Macalelon. Dapat na muling ibalik sa puso at diwa ng mga Quezonin ang nagngangalit na alon ng pagkakaisa at pakikibakang masa upang mariing tutulan ang proyektong ito. Mayaman ang mga aral na mahahalaw sa kasaysayan ng kanilang sama-samang pagkilos upang pigilan ang pagtatayo ng dam sa nakalipas na sampung taon.

K

TUGON

NI PATNUBAY DE GUIA

Ano ang tindig ng rebolusyonaryong kilusan sa pananakop ng China sa mga isla sa Spratly?

Kinukundena at tinututulan ng rebolusyonaryong kilusan ang pananakop ng China sa mga isla sa Spratly na saklaw ng ipinaglalabang teritoryo ng Pilipinas. Simula't sapul, tutol ang PKP-BHB-NDFP sa dayuhang pangangamkam sa rekursu at patrimonyang yaman ng bansa tulad ng ginagawa ng China sa West Philippine Sea (WPS). Mariin ding nilalaban ng mamamayan ang iba pang maniobra ng China na manghimasok sa ekonomya't politika ng Pilipinas.

Kasama ng sambayanan ang NDFP sa paggigiit sa soberanya sa teritoryo at karapatan ng Pilipinas sa *exclusive economic zone* (EEZ) sang-ayon sa United Nations Convention on the Law of the Sea (UNCLOS). Malakas na nananawagan ang mga rebolusyonaryong pwersang Pilipino ng pagpapalayas sa mangangamkam na China mula sa mga isla sa Spratly at EEZ ng Pilipinas.

Umigting ang pakikibakang bayan kaugnay ng WPS sa panahon ng rehimeng US-Aquino hanggang sa kasalukuyang rehimen kung kailan umarangkada ang okupasyon at pagtatayo ng mga artipisyal na isla ng China sa Spratly. Mula 2013 ay nagsasagawa na ng *dredging* at reklamasyon ang China sa kulumpon ng mga isla sa Spratly.

Sa mga litrato mula sa himpapawid, kitang-kita ang pagbabago sa mga *geologic features* sa Spratly tulad ng Zamora (Subi) Reef, Panganiban (Mischief) Reef, Burgos (Gaven) Reef, at Kagitingan (Fiery Cross) Reef. Tinayuan ito ng mga *airstrip*, daungan, istasyon ng radar at iba pa. Malinaw sa desisyon ng Permanent Court of Arbitration (PCA) ng UNCLOS noong 2016 na labag sa kumbensyon ang pagmimilitarisa ng China sa Kagitingan Reef na sinimulan nitong okupahin noong 1987. Tinukoy rin na Pilipinas ang may karapatan sa Panganiban Reef na tinayuan na ng istruktura ng China.

Ang mga artipisyal na isla ay basehan ng mga pwersang Chinese sa South China Sea at pruweba ng pananakop nito sa Spratly. Pangmatagalan ang plano ng China rito. Kayang lapagan ng 24 eroplanong pandigma at apat na malalaking eroplano ang mga paliparan habang taglay ng mga baseng nabal ang pinaka-abanteng teknolohiya sa komunikasyon, lunsaran ng misayl, at iba pa.

Kakambal ng pagtatayo ng mga pasilidad militar ang pagtambay ng daan-daang sasakyan ng Chinese Coast Guard (CCG), People's Liberation Army (PLA)-Navy, milisyang Chinese at malalaking barkong pangisda sa saklaw ng Spratlys at buong WPS. Nitong Hunyo, inilantad ng *geospatial intelligence firm* mula sa US na Similarity ang presensya ng 238 barko sa EEZ ng Pilipinas. Halos lahat o 236 barko ang nasa mga isla ng Spratly. May 11 barko malapit sa Pag-asa Island na sakop ng Kalayaan, Palawan.

Mahigpit na binatikos sa loob at labas ng Pilipinas ang pagdumog ng mga barkong Chinese sa WPS mula Marso 2021. Higit 200 barkong Chinese ang sinitang nakahimpil sa Julian Felipe Reef (JFR) na 175 *nautical miles* lamang ang layo mula sa Bataraza, Palawan. Nitong Abril, inulat ang presensya ng 261 barkong Chinese sa Burgos Reef, Pag-asa Island, Likas (West York) Island, Kota (Loaita) Island at Ayungin (Second Thomas) Shoal at iba pang isla sa WPS.

Lubhang apektado ng sitwasyon ang mga mangangisda ng Pilipino. Paulit-ulit na itinatayo ng mga marinong Chinese ang mga mamamalakaya habang walang pakundangang sinusuyod ng malalaking barkong Chinese ang mga bahura sa WPS. Lumala ito bunsod ng *verbal agreement* ni Duterte kay Xi Jinping na malayang mangisda ang mga Chinese sa WPS. Ang 270 barkong namataan sa Zamora at Panganiban Reef ay inaasahang may pinagkumbinang huli na 3,240 metriko tonelada (MT) kada araw o 1.2 milyong MT kada taon.

Pinipinsala din ng mga *trawler* at komersyal na barko ang mga bahura na pangitlugan ng mga isda. Pananagutan ng China ang pagkasira ng higit 124 kilometro

kwadrado ng bahura sa WPS.

Laway na laway ang China sa Spratly at buong WPS dahil sa yaman at estratehiko nitong posisyon. Tinatayang may \$26 trilyong halaga ang *natural gas* at langis na matatagpuan sa EEZ ng Pilipinas—na malaking bahagi ay nasa ilalim ng mga isla ng Spratly. Samantala, napakayaman ng WPS na pinagmumulan ng 10% ng pandaigdigang huli ng isda.

Susi rin ang pwesto ng Spratly dahil lagusan ito ng 30% ng mga barkong pang-kalakal sa daigdig o katumbas ng \$3 trilyong kalalakal taun-taon. Dumadaan dito ang langis mula Gitnang Silangan na papunta sa mga indyustralisadong bansa na Japan, South Korea at Taiwan.

ANG MAYAMANG BIODIVERSITY SA SPRATLY

2,927 species ng buhay dagat

776 benthic species (mga hayop at halaman sa kailaliman ng dagat)

382 species ng matitigas na coral

524 species ng isdang dagat

262 species ng algae at damong dagat

35 species ng ibong pandagat

20 species ng marine mammals at mga pagong

Tirahan ng *green turtle* (endangered) at *hawksbill turtle* (critically endangered)

Pahingahan at lugar-paramihan (breeding site) ng mga ibon tulad ng *white tern*, *brown booby* at *great crested tern*

Tahanan ng mga *dolphin*, *killer whale*, *sperm whale* at *pilot whale*

Kailangan din ng China ang mga isla sa Spratly para sa paghamon nito sa US. Napaliligiran ang China ng mga base militar ng US sa Asya-Pasipiko kaya't naghahabol ang una na kontrolin ang South China Sea upang maging base at lunsaran nito sakaling pumutok ang digmaan.

Humantong na ang ilegal na okupasyon ng China sa WPS sa karahasan laban sa mga Pilipino. Noong Hunyo 9, 2019, pinataob ng isang barkong Chinese ang barkong FB GemVer sa Recto Bank. Muntik nang mamatay sa laot ang 22 tripulante mula sa San Jose, Occidental Mindoro na sakay ng FB GemVer. Hinabol din ng mga armadong barkong Chinese ang isang tim ng midya na nais mag-ulat sa kalagayan ng mga mangingisdang Pilipino nitong Abril 8, 2021.

Lahat ng paglalapastangan ng China sa soberanong karapatan ng mga Pilipino ay mahigpit na nilalabanan ng rebolusyonaryong kilusan. Itinuturing ng PKP na "imperyalistang agresyon ang pagtatayo ng mga istruktura at militarisasyon ng mga artipisyal na isla" ng China sa WPS. Nanawagan din ang PKP na itulak ang paglalansag sa mga pasilidad militar at pag-atras ng mga pwersang Chinese sa WPS.

Pinakatampok na aksyon ng PKP ang atas nito sa Bagong Hukbong Bayan noong 2020 na maglunsad ng punitibong aksyon laban sa mga kumpanyang Chinese na sangkot sa ilegal na konstruksyon at paninira sa karagatan ng WPS. Umapela rin ang PKP sa internasyunal na komunidad na pag-ibayuhin ang pang-ekonomiko at diplomatikong presyur sa China sa pamamagitan ng pag-blacklist sa mga nasabing kumpanya.

Naniniwala ang PKP-NDFP-BHB na estratehiko ang halaga ng teritoryo sa Spratly sa pangmatagalang pag-unlad ng Pilipinas. Sa ganitong diwa pursigidong kumikilos ang mga pambansa demokratikong pwersa upang pagkaisahin ang mamamayan na labanan ang pangangamkam ng China sa Spratly. Sinusuportahan din ng NDFP ang paggigiit at pagpapatupad sa *arbitral award* ng PCA. Maaasahan ng bayan ang pambansa demokratikong kilusan sa paniningil sa China para sa pamiminsala nito sa karagatan at pagkakait sa kabuhayan ng mga mangingisda. ☒

ANG KALAYAAN GROUP OF ISLANDS

Ang Kalayaan Group of Islands ay isang bahagi ng mga isla sa Spratly. Una itong inintegra sa Palawan noong 1972 at pormal na itinalaga bilang munisipyo ng probinsya sa bisa ng Presidential Decree 1596 ni Ferdinand Marcos na isinabatas noong Hunyo 11, 1978. Sumasaklaw ito sa walong islets at dalawang reef na may kabuuang sukat na 79 ektarya.

Naging kontrobersyal ang pag-ako ng Pilipinas sa Kalayaan dahil kay Tomas Cloma, isang Pilipinong negosyante, na nag-angkin sa mga isla noong 1956. Kasama ang 40 tauhan, idineklara ni Cloma na pag-aari niya ang mga isla at pinangalanan itong Free Territory of Freedomland (Malayang Teritoryo ng Lupain ng Kalayaan). Umani ito ng pagbatikos ng Taiwan na kagyat na inokupa ang kalapit na isla ng Itu Aba at pinaghuhuli ang sinumang tauhan ni Cloma na lalapit dito.


Mga islet at reef ng Kalayaan

1. Pag-asa (Thitu Island)
2. Likas (West York Island)
3. Parola (Northeast Cay)
4. Lawak (Nanshan Island)
5. Kota (Loaita Island)
6. Patag (Flat Island)
7. Panata (Lankian Cay)
8. Balagtas (Irving Reef)
9. Ayungin (Second Thomas Shoal)
10. Rizal (Commodore Reef)

Ika-5 taon ni Duterte sa poder, sinalubong ng protesta

Sinalubong ng mamamayan ng kilos-protesta ang ikalimang taon bilang pangulo ni Duterte noong Hunyo 30. Sa Timog Katagalugan, tumungo ang mga militanteng organisasyon sa pamumuno ng Bagong Alyansang Makabayan-Southern Tagalog (BAYAN-ST) sa San Pedro, Laguna upang ipanawagan na wakasan ang limang taong tiraniya ng rehimeng Duterte.

Sa pagkilos, iniladlad nila ang isang mural na nagpapakita ng limang taon sa ilalim ng pasistang rehimeng Duterte. Nasa unahan ng kanilang



martsa ang istrimer na may panawagang “Wakasan ang limang taong kagutuman, kahirapan at pamamasista sa ilalim ng rehimeng US-Duterte”.

Ayon sa BAYAN-ST, “Sa loob ng limang taong pagkapangulo ni Duterte, binalot ng karahasan, intimidasyon, paglabag sa karapatang-pantao, pagpapahirap, at kagutuman ang buong bansa na lalo pang inilantad sa gitna ng lumalalang krisis pangkalusugan at ekonomya.”

Kinundena ng grupo ang kapalpakan at kainutilan ng rehimen sa ilalim ng pandemyang COVID-19, mga neoliberal na patakaran, labis-labis na kurapsyon at kroniyismo, kapabayaan sa mga manggagawa at magsasaka, at iba pa. Ipinahayag din ng grupo ang labis-labis na disgusto sa kapit-tuko sa kapangyarihan ni Duterte.

Nanawagan ang mga militanteng grupo ng hustisya sa mga krimen ng rehimeng Duterte. Idiniin ng BAYAN-ST na ang rehiyong Timog Katagalugan ang isa sa mga *hotspot* ng kabi-kabilang pamamaslang at iba pang paglabag sa karapatang tao sa ilalim ng rehimen. Noong Marso 7, naganap ang Bloody Sunday masaker. Tinaguriang “Huli” Week ang Semana Santa kung saan dinakip ang ilang mga kilalang lider at aktibista sa rehiyon. Sa buwang ito, pinaslang sa madugong kampanyang kontra-iligal na droga ang 16-taong gulang na si Johndy Maglinte sa Biñan, Laguna dahil nasaksihan niya ang pagpatay ng mga pulis sa kasamahan niyang si Antonio Dalit. Noong madaling araw ng Hunyo 25, nireyd at dinakip ang mag-asawa at organisador ng mga magsasaka na sina Dana Marie Marcellana at Christian Relao at sinampahan ng mga gawa-gawang kaso.

Pagtatapos ng BAYAN-ST, “Hindi na maatim pa ng mamamayan ang ilang taong pagpapahirap ng rehimeng Duterte, marapat lamang na patalsikin ang inutil, pahirap, at pasistang rehimeng Duterte at wakasan na ang paghahari-harian nito.” ☐



Paano itinataguyod ng rebolusyonaryong kilusan ang karapatan ng mga may piniling kasarian?

“..Itataguyod ang karapatan ng mga lesbyana, bakla, baysekswal at transgender na ilahad ang kanilang identidad at susuportahan ang kanilang pakikibaka laban sa lahat ng anyo ng diskriminasyon”.

—Makibaka para sa pambansang pagkakaisa at mga demokratikong karapatan (Ikatlong punto sa Programa ng PKP para sa pambansa-demokratikong rebolusyon)

Taun-taon ay inilulunsad tuwing buwan ng Hunyo ang Pride March, isang martsa-protesta ng mga may piniling kasarian sa buong daigdig. Bilang paggunita ito sa marahas na panunupil ng mga pulis sa serye ng mga protesta ng mga may piniling kasarian na nagsimula sa Stone Wall Inn sa Manhattan, New York City noong Hunyo 1969.

Sa Pilipinas, sing-aga pa ng 1994 ay nagsimula na ang mga martsa ng paggunita rito sa pamamagitan ng iba’t ibang ligal na organisasyon ng mga may piniling kasarian. Sa okasyong ito iginigiit nila, kasama ang iba pang sektor na sumusuporta sa kanilang pakikibaka ang pantay na pagtingin sa lahat ng kasarian at pagrespeto sa kanilang karapatang pumili ng kasarian at ihayag ito.

Kinikilala at sinusuportahan ng buong rebolusyonaryong kilusan sa Pilipinas ang karapatan ng sinuman, anuman ang kanyang paniniwala, identidad at maging kasarian. Sila, kasama ang iba pang sektor at uri sa lipunang Pilipino ay nakararanas ng pagsasamantala at pang-aapi ng imperyalismo, pyudalismo at burukrata-kapitalismo.

Pinagsasamantalahan sila batay sa uri at sektor na kinabibilangan nila sa lipunan. Biktima sila ng kawalan ng lupang masasaka, at wala o di sapat ang hanapbuhay para sa kanila. Tulad ng mga kababaihan, mababa ang pagtingin

ng lipunan sa mga may piniling kasarian. Kinukutya at biktima din sila ng diskriminasyon sa lipunang malakolonyal at malapyudal na nangingibabaw ang bulok na kulturang burgis at pyudal na itinataguyod ng naghaharing uri sa Pilipinas at dayuhang imperyalista. Tutol tayo sa lahat ng anyo ng diskriminasyon at nilalabanan natin ang lahat ng maling gawi o pananaw na kontra sa mga indibidwal na may piniling kasarian.

Pinakikilos ng rebolusyonaryong kilusan ang lahat ng may piniling kasarian para lumahok sa rebolusyon at mag-ambag ng kanilang talino, galing at lakas para sa paglilingkod sa bayan. Ang kanilang pakikibaka para kilalanin at tratuhing kapantay ng iba pang kasarian ay bahagi at hindi hiwalay sa pakikibaka ng bayan para sa pambansang demokrasya at kalayaan.

Sa ngayon, paparami ang mga may piniling kasarian na sumasapi sa mga alyadong organisasyon ng NDFP. Bukas ang MAKIBAKA (Makabayang Kilusan ng Bagong Kababaihan), ang lihim na pambansa-demokratikong organisasyon para sa mga kababaihang Pilipino at iba pang pambansa demokratikong organisasyon sa pagsapi ng mga may piniling kasariang nagsusulong ng kilusan para sa pagpapalaya sa kanilang sektor at lahat ng uring inaapi’t pinagsasamantalahan. Ang

pinakaabanteng mga kasapi nito ay kusang-loob na sumasapi sa Partido Komunista, niyayakap ang armadong pakikibaka at sumasampa sa Bagong Hukbong Bayan. Laging bukas ang rebolusyonaryong kilusan sa pagbubuo ng rebolusyonaryong organisasyon ng mga may piniling kasarian na hindi lamang magsusulong ng kanilang mga demokratikong karapatan kundi pati ng pambansa demokratikong rebolusyon.

Malinaw sa mga patakaran ng PKP at BHB ang pagtataguyod sa karapatan ng mga may piniling kasarian. Katunayan, saklaw ng Mga Gabay at Tuntunin sa Pag-aasawa sa Loob ng Partido ang pagkilala sa karapatan sa pagpili ng kasarian ng sinumang kasapi hanggang sa pagtatayo at pagtataguyod sa relasyon ng mga may piniling kasarian. Kinikilala, at itinataguyod ng PKP ang pagtatayo nila ng rebolusyonaryong relasyon hanggang sa pagpapakasal at pagpapamilya.

Naninindigan ang Partido at buong kilusan na nakabatay sa pampulitikang pagkakamulat ng

mga kasapiang nito at ng masa ang pagtanggap, pagtataguyod at pagtatanggol sa karapatan ng mga may piniling kasarian. Kung gayon, inieduka niya ang buong rebolusyonaryong hanay at maging ang mamamayan sa kalagayan, mga pagsusuri at paninindigan ng Partido sa mga isyu at usaping kinakaharap ng mga may piniling kasarian.

Ang kampanyang edukasyon at pagtataas ng kamalayan ay nakabalangkas sa unti-unting pagwasak sa kultura ng lipunang Pilipino na pyudal, burgis at kolonyal. Sa balangkas nito, nagpapanibagong-hubog ang lahat ng pwersang rebolusyonaryo para mulat na itaguyod ang pambansa, siyentipiko at pangmasang kultura na pantay na kumikilala at gumagalang sa karapatan ng lahat ng kasarian. Resulta nito, mahusay na naipatutupad ng Partido ang kanyang mga patakaran at regulasyon habang sa kabilang panig ay mulat na sumusunod ang mga kasapi sa mga ito. Sa rehiyong TK, naglulunsad ng mga talakayan, porum at iba pang kahalintulad na aktibidad hinggil sa *gender*

awareness and sensitivity ang mga organo ng Partido at yunit ng BHB.

Inabot na natin sa isang antas ng pagsulong ang pagpapasapi at pagpapaunlad ng mga kadre at opisyal ng Partido at BHB mula sa hanay ng mga may piniling kasarian. Katunayan, ilang may piniling kasarian na kasapi ng BHB ang magiging na nagbuwis ng kanilang buhay para sa sambayanan. Kabilang sa mga ito sina Ian “Ka Ben” Maderazo na isang kadrang pamprobinsya ng Quezon; Roval “Ka Ilor” Valerio na isang Pulang kumander ng BHB; Ruben “Ka Sarah” Villaflora na isang opisyal sa lohistika ng BHB; Lilibeth “Ka Moc” Donasco na isang opisyal medikal; at John Carlo “Ka Yago/Iñigo” Alberto Capistrano na isang instruktur pampulitika at doktor ng mga hayop ng masa.

Hanggang sa kasalukuyan, patuloy ang pagsapi ng mga may piniling kasarian—lesbiyana, bakla, baysekswal at *transgender* sa Partido at BHB. Ubos-kaya silang nag-aambag ng sarili para sa rebolusyon. ☐

Southern Tagalog Pride March, inilunsad sa UPLB

Inilunsad ang Southern Tagalog Pride March sa pangunguna ng Southern Tagalog Pride at Gabriela Southern Tagalog sa Unibersidad ng Pilipinas Los Baños (UPLB) noong Hunyo 28. Nilahukan ng mahigit sa 300 mga lesbiyana, bakla, baysekswal, *transgender* at iba pang mga may piniling kasarian (LGBTQIA+) at mga taga-suporta nila ang lumahok sa protesta.

Nanawagan ang mga nagpoprotesta ng kapayapaan at pagkakapantay-pantay sa lahat ng kasarian. Ayon sa Southern Tagalog Pride, kabilang ang LGBTQIA+ sa mga pinagkakaitan ng seguridad at pantay na karapatan. Inihalimbawa nila ang kawalang hustisya sa kaso ni Jennifer Laude, isang *transgender*, na pinaslang ni US Marine Lance Corporal Joseph Scott Pemberton noong 2014. Sa halip na pagsilbihan ang sentensya sa pagpatay, ipinagkaloob pa ng rehimeng Duterte ang *absolute pardon* kay Pemberton noong nakaraang taon nang hindi umubra ang pakanang *conduct time allowance* sa nasabing kriminal. Itinataguyod lamang ni Duterte ang patuloy na kawalang hustisya sa bansa at pagbibigay

ng espesyal na pagtrato at pabor sa mga dayuhang kriminal tulad ni Pemberton.

Pinakahuling naiulat na pandarahas sa LGBTQIA+ ay ang pagdukot at pagpatay sa isang *transwoman* mula sa Bacoar, Cavite noong Enero 2021. Sa Quezon City, dinukot, inahasa at pinatay ang *transman* na si Ebeng Mayor noong Mayo 2021.

Nanindigan ang Southern Tagalog Pride na kailangang isabatas ang Sexual Orientation and Gender Identity Expression Equality (SOGIE) Bill na naglalayong ipagtanggol ang lahat ng mamamayan mula sa diskriminasyon, anuman ang

kanyang kasarian.

Bukod sa paggalang sa karapatan ng mga may piniling kasarian at paglaban sa diskriminasyon, kinondena sa kilos-protesta ang Anti-Terror Law at militaristang *lockdown*. Ipinanawagan din nila na palayain lahat ng bilanggong pulitikal, pagkakamit ng hustisya at makatarungan at pangmatagalang kapayapaan.

“Naniniwala kami na ang paglaya ng LGBTQIA+ *community* ay naka-ugnay sa paglaya ng lahat ng mga sektor sa lipunan. Kaisa kami ng buong bayan sa paglaban sa pasismo ng rehimeng Duterte.” pagtatapos ng Southern Tagalog Pride. ☐





Mag-asawa at organisador ng mga magsasaka, dinakip sa San Pablo, Laguna

Dinakip ng mga pulis noong Hunyo 25 ang mag-asawang Dana Marie Marcellana at Christian Relao sa Brgy. San Diego, San Pablo, Laguna madaling araw ng Hunyo 25. Nireyd ng mga pulis ang kanilang tahanan at inaresto habang iniwan ang kanilang isang taong anak na umiiyak. Sinampahan sila ng gawa-gawang kasong rebelyon at *illegal possession of firearms*.

Si Dana Marie Marcellana ay anak ni Eden Marcellana, isang *human rights worker* na pinaslang ng mga mersenaryong militar sa pangunguna ng berdugong si

Gen. Jovito Palparan. Dinukot at pinaslang sina Ka Eden at si Eddie Gumanoy noong Abril 21, 2003 sa gitna ng *fact finding mission* ng Karapatan-Southern Tagalog sa mga karumal-dumal na krimen ng AFP sa panahon ng Oplan Habol Tamaraw sa Mindoro. Bata pa lamang noon si Dana.

Bunsod ng karahasan, namulat si Dana at piniling magsilbi sa mamamayan sa pamamagitan ng pagiging organisador ng mga magsasaka. Naging kasapi si Dana ng Katipunan ng mga Samahang Magbubukid sa Timog

Katagalugan (KASAMA-TK) habang naging miyembro si Christian ng Pinagkaisang Lakas ng mga Magsasaka sa Quezon (PIGLAS-Quezon).

Ang pagdakip sa mag-asawa at pag-atake sa iba pang mga aktibista sa ilalim ng rehimeng Duterte ay bahagi ng imbing pakana ng estado na patahimikin ang mga progresibo, oposisyon at kritiko gamit ang kontra-mamamayan at anti-demokratikong Anti-Terror Law. **K**

Antonio Molina ng Palawan 7, kagyat na palayain

Nananawagan ang mga Palaweño at mga kaanak ni Antonio Molina, 66, ng Palawan 7 na kagyat siyang palayain dahil sa kanyang malubhang kundisyong medikal. Ang Palawan 7 ay mga detenidong pulitikal na inaresto ng AFP-PNP sa isang tsekpoynt sa Puerto Princesa City, Palawan noong Oktubre 4, 2019. Sinampahan sila ng gawa-gawang kasong *illegal possession of firearms and explosives*.

Si Molina o mas kilala bilang Tatay Antonio ay may terminal na kanser sa bituka. Bukod dito, nagdurusa siya sa namamagang *lymph nodes* at altapresyon. Nakararanas siya ng labis na

pananakit sa pag-ihi dahil sa sakit sa bato. Dahil sa di makataong kalagayan sa bilangguan, lumubha ang kanyang kalagayan.

Patuloy na lumalala ang kalagayan ni Tatay Antonio dahil sa labis na kapabayaang sa kanya at pagsasawalambahala ng rehimen sa kanyang mga karapatan bilang isang detenidong pulitikal. Habang nakakulong, wala siyang agarang natamong atensiyong medikal at pinagkakaitang ma-tsek-ap ng kanyang doktor. Isa si Tatay Antonio sa pinakabulnerableng mahawahan ng COVID-19 dahil sa kanyang edad at sakit. **K**



Mga residente sa Interlink Beach, dinahas

Dinahas at pinagkaitan ng kabuhayan ng mga pulis at gwardya ng Canyon Cove (CC) ang mga residente ng Interlink Beach sa Brgy. Wawa, Nasugbu, Batangas. Pilit inaangkin ng mga komprador ang lupa sa pakikipagsabwatan sa mga kasapi ng *local government units* (LGU) na katulad nina Brgy. Captain Vicente Atienza, Municipal Engineer Romeo Velasco at Municipal Environment and Natural Resources Officer (MENRO) Francisco Amuyo.

Noong Hunyo 17, bandang alas-4 ng hapon, dinemolis ng mga

pulis at gwardya ng Canyon Cove ang 10 *cottages* sa Interlink Beach sa pangunguna ng Head Security ng CC na si Jonathan Yumul. Bago ito, hinarangan ng mga gwardya ng CC at ng mga opisyal ng barangay ang kalsada patungo sa Interlink Beach.

Dahil sa iligal na panghaharang, naglunsad ng dayalogo ang mga residente sa mga LGU noong Hunyo 16. Sa dayalogo, pumayag lamang si Velasco na tanggalin ang harang kung gigibain ng mga taumbaryo ang mga *cottage*.

Matapos ang paggigiba, hinaras

at dinahas naman ng mga gwardya ng CC ang mga manininda sa Interlink Beach noong Hunyo 19. Winasak ng mga ito ang mga tindahan at pinagbawalan na magtinda sa tabing dagat. Bunsod nito, napilitan ang mga manininda na pansamantalang ilipat ang kanilang mga tindahan.

Higit pang nagdurusa ang mga residente ng Interlink Beach dahil sa pagkawala ng kanilang kabuhayan. Ang *community resort* ay nagsilbing pang-dugtong sa krisis na kinakaharap nila sa pandemyang COVID-19. **K**

Wala akong ibang sadya

ni Ka Yana

Wala akong ibang sadya
sa pakikibakang ginawa
Kundi ang mapalaya ka,
Ang makita kang maginhawa,
at ligtas sa pagdurusa

Kaming mga anak mo,
laon nang binubusabos,
dinarahas,
At kaylangan kong may magawa,
upang ang katarungan
ay maihandog sa 'yo, aking Ina

Walang ibang sadya,
panahon at buhay ko rin ay itataya,
Mahanap lamang ang lunas,
sa sakit ng bayang naaagnas

Pambubusabos ay tiyak ding
magwawakas,
Armas ang hahawan ng landas
Hadlangan man nitong rehas,
Diwa ay pilit aalpas

Sapagkat walang ibang sadya,
sa pakikibaka kong ginawa,
wala akong pag-aalinlangan,
ipagpapatuloy ang sadya
para sa kalayaang
pinaghihirapang makuha

At kung sakali man
panahon ko'y kapos na
Alam kong nariyan ka
iisa ang aking sadya
At marami pang tulad nating
dalawa
Nakikibaka para sa kalayaang
sadya!

Tunay na Ginto

ni Ka Yael

Ang tunay na ginto
hindi natatakot idarang
sa nagngangalit na apoy.

Sa lumalagablab na pandayan
ng makauring tunggalian:
ang mamamayang lumalaban
para sa karapatan
ang hukbong sumusulong
sa mga armadong labanan
at lahat na mithi ay tunay
na kalayaan at kapayapaan
Taglay ang bagsik ng dakilang pagkakasubo;
sila'y mas tumitibay at mas tumatalas.

Tuloy-tuloy silang susulong
lalakas ang digmang bayan.
Anuman ang mangyari: babagsak
ang mapagsamantala't mapang-api
Hindi maaaring hindi!

